


Waor of niet waor ?

Dick van Bloemendaal, tekening Gerard Schut

Hele kleine verhaoltsjes die soms warkeluk gebeurd bin en verhaoltsjes die ik uut mun duum 'ezeugen het. Veur julie un vraag, mar veur mien un weet, welke wel of niet waor bin.

De moter mos verkocht worre

Karel van Voorthuuze had un mooie Harley Davidson moter 'ekocht zonder dat zun vaoder dur iets van of wist en dat was niet al te best want Karel was nog minderjaorig en had dus ok geen moterriebewies. Hie mocht dur niet op rieën van de ouwe



Kees en dus mos die Harley mar weer verkocht worre.

Ut het un paor maonden 'eduurt vur dat dur un koper was, mar uiteindeluk had hie een keerl uut

Baareveld die de moter kocht. Op un zaoterdagmiddag mos de moter vort'ebrocht worre naor Baareveld. Karel vreug an mun breur Aolt of hie mee wilde mit zun eigen moter en Karel op de Harley, dan kossen ze samen weerum op Aolt zun moter. Jammer genug vur Karel mos Aolt arges aarst naor toe mar hie vun ut best as Anton, un aare kameraod van Karel, mit Aolt zun moter meeinging.

En zo reeën Anton en Karel op twee moters naor Baareveld. Net vurbie ut Hollands Spoor werden ze an'ehouwen deur de pliesie um de papieren te laoten zien en toen waren ze allebei de klos want ze han allebei geen moterriebewies. Lopes mit de moter an de hand mossen ze mee naor ut pliesiebureau in ut darp, vur Anton ging dat nogwel mar Karel het zun eigen ut schompes 'edrukt an die zwaore Harley.

Op ut bureau werd ur procesverbaol op'emaakt. Toen ze an Anton um zun beroep vreugen zei hie dat hie woeningstofferder was, mar dat geleufde de plietie niet want op zun officiële papieren stung bie beroep: bedrijfsleier. De plietie vreug toen hoe of ut zat en toen zei Anton dat zun papieren zun snelle carrière niet bie kosse houwen. Ze mochten de moters niet veerder gebruiken mar ze mossen wel vort. Ze bin toen gaon liften, want geld han ze niet in dur zak, en uiteindeluk bin ze achterop een vrachtwagen mit oud iezer mee'ereëen tot an ut woenwagenkamp an de Voorthuzerstraot bie Putten. Ut leste endje mossen ze lopen um tuus te kommen.

Ze bin naor Aolt 'egaon die gelukkig weer tuus was en naor Dries van Eck. Mit zun vieren bin ze in Dries zun auto naor Baareveld 'egaon en daor is Aolt mit zun moter weer naor huus 'egaon en Karel en Anton bin mit Dries mee'ereëen, naodat de koper uut Baareveld de Harley had op'ehaold. Anton is dur of 'ekommen mit un bekeuring mar Karel mos vurkommen umdat hie minderjaorig was. Toen hie in Harderwiek bie ut gerecht mos kommen is zun vaoder mee 'egaon en toen ut vonnis was uut'espreuken zei de ouwe Kees van Voorthuuzen tegen de rechter dat hie Karel mar op mos sluiten want luusteren wou hie toch niet en geld vur de bekeuring had hie ok niet. De rechter het dat niet 'edaon en zodoende kon Karel weer mee naor huus en mos hie zun spaarpot mar anspreken.

+++